




YOKE Ya melihat bahagian dapurnya yang mendap akibat tanah runtuh di Taman Bersatu, Rawang semalam.

Tanah mendap membimangkan penduduk

RAWANG - Kira-kira 10 buah keluarga meluahkan kebimbangan berikutan rumah yang didiami mereka mengalami retakan/susulan runtuh tebing Sungai Rawang bersebelahan Taman Bersatu, Rawang, dekat sini yang berlaku pada Jumaat lalu.

Kejadian pada pukul 3 petang itu dipercayai berpunca daripada kerja-kerja menaik taraf Sungai Rawang yang dijalankan oleh Jabatan Pengairan dan Saliran (JPS) kira-kira 15 meter dari kawasan perumahan mereka sejak dua minggu lalu.

Akibat insiden itu, sebanyak lima buah keluarga diarahkan berpindah

bagi mengosongkan kediaman masing-masing.

Menceritakan detik cemas itu, mangsa, Ching Yoke Ya, 45, yang merupakan suri rumah berkata, dia sempat berlari ke ruang tamu bagi menyelamatkan diri dan keluarga sebelum dapur rumahnya runtuh akibat mendapan tanah.

"Ketika kejadian, saya sedang memasak di dapur kemudian saya dengar bunyi retakan dan memberi amaran kepada pekerja pembinaan supaya menghentikan operasi mereka dengan segera.

"Namun, cuaca hujan lebat serta

bunyi bising jentera menyebabkan mereka tidak mendengar amaran saya. Saya kemudian mengambil keputusan untuk menyelamatkan diri dan keluarga," katanya kepada pemberita semalam.

Tambahnya, ruang dapurnya runtuh sedalam kira-kira dua meter dan mengalami kerugian dianggarkan berjumlah RM25,000.

Seorang lagi penduduk, Khairudin Harun, 48 berkata, rumahnya tiba-tiba mengalami retakan dan semakin mendap sejak kerja-kerja penambahbaikan dilakukan setelah menetap lebih 10 tahun di kawasan tersebut.